

VENDIM
Nr.704, datë 25.8.2010

PËR BASHKËPUNIMIN E INSPEKTORATIT SHTETËROR TË PUNËS ME
INSTITUCIONET NË VARËSI TË MINISTRISË SË EKONOMISË, TREGTISË DHE
ENERGJETIKËS

Në mbështetje të nenit 100 të Kushtetutës dhe të nenit 12 të ligjit nr.9634, datë 30.10.2006, "Për inspektimin e punës dhe Inspektoratin Shtetëror të Punës", me propozimin e Ministrit të Punës, Çështjeve Sociale dhe Shanseve të Barabarta dhe të Ministrit të Ekonomisë, Tregtisë dhe Energjetikës, Këshilli i Ministrave

VENDOSI:

1. Inspektorati Shtetëror i Punës bashkëpunon me institucionet në varësi të Ministrisë së Ekonomisë, Tregtisë dhe Energjetikës për:

a) shkëmbimin e informacionit për të dhënat e subjekteve që ushtrojnë veprimtari me leje të posaçme të parashikuara në ligje të veçanta;

b) hartimin e programeve të punës për organizimin e kontrolleve të përbashkëta sipas problematikës;

c) shkëmbimin e informacionit në rastet e konstatimit të shkeljeve të legjislacionit që nuk mbulohen nga institucioni që kryen kontrollin;

ç) bashkëpunimin në rast të hetimit të aksidenteve në punë, si dhe të sëmundjeve profesionale;

d) kryerjen e trajnimeve të përbashkëta për kualifikimin e specialistëve e të inspektorëve;

dh) kryerjen e studimeve për çështje të përbashkëta në fushën e sigurisë e të shëndetit në punë;

e) hartimin dhe zbatimin e projekteve që synojnë përmirësimin e sigurisë e të shëndetit në punë të punëmarrësve.

2. Inspektorati Shtetëror i Punës bashkëpunon me Inspektoratin Qendror Teknik për:

a) shkëmbimin e informacionit për të dhënat e subjekteve që ushtrojnë veprimtari me leje nga IQT-ja, një herë në vit;

b) hartimin e programeve të punës për organizimin e kontrolleve të përbashkëta, gjatë cilave inspektorët e IQT-së kontrollojnë zbatimin e legjislacionit në fuqi për sigurinë në punë të pajisjeve dhe instalimeve elektrike, të enëve nën presion dhe për naftën e gazin dhe nënproduktet e tyre, ndërsa inspektorët e ISHP-së kontrollojnë zbatimin e dispozitave që lidhen me kushtet e punës: kohëzgjatjen e punës e të pushimit, pagat, punësimin e të miturve, të grave shtatzëna dhe me fëmijë në gji;

c) kryerjen e hetimeve të përbashkëta, në rastet e aksidenteve në punë e të sëmundjeve profesionale dhe plotësimin nga të dyja palët të dokumentacionit të hetimit të aksidentit/sëmundjeve profesionale;

ç) kryerjen e trajnimeve të përbashkëta për kualifikimin e specialistëve dhe të inspektorëve;

d) kryerjen e studimeve për çështje të përbashkëta në fushën e sigurisë e të shëndetit në punë;

dh) organizimin, një herë në vit, të takimeve të përbashkëta, në nivel inspektorësh/drejtorësh të përgjithshëm.

3. Inspektorati Shtetëror i Punës bashkëpunon me Repartin e Inspektim/Shpëtim-Minierave (RISHM) për:

a) shkëmbimin e informacionit për të dhënat e subjekteve, që ushtrojnë veprimtari me leje minerare nga Ministria e Ekonomisë, Tregtisë dhe Energjetikës, një herë në vit;

b) hartimin e programeve të punës për organizimin e kontrolleve të përbashkëta, gjatë të

cilave inspektorët e IQT-së kontrollojnë zbatimin e legjislacionit në fuqi për sigurinë në punë të pajisjeve dhe të instalimeve elektrike, të enëve nën presion dhe për naftën e gazin dhe nënproduktet e tyre, ndërsa inspektorët e ISHP-së kontrollojnë zbatimin e dispozitave që lidhen me kushtet e punës: kohëzgjatjen e punës e të pushimit, pagat, punësimin e të miturve, të grave shtatëzëna dhe me fëmijë në gji;

c) në rastet e aksidenteve në punë në subjektet minerare me pasojë vdekjen ose jo të punëmarrësve, inspektorët e punës plotësojnë procesverbalin e aksidenteve në punë (formularin e ISSH-së), bazuar në relacionin e hetimit të aksidentit të përgatitur nga inspektorët e RISHM-it;

ç) kryerjen e trajnimeve të përbashkëta për kualifikimin e specialistëve e të inspektorëve;

d) kryerjen e studimeve për çështje të përbashkëta në fushën e sigurisë e të shëndetit në punë;

dh) organizimin, një herë në vit, të takimeve të përbashkëta në nivel inspektorësh/drejtorësh të përgjithshëm për çështjet e sigurisë e të shëndetit në punë në fushën minerare.

4. Ngarkohen Ministria e Punës, Çështjeve Sociale dhe Shanseve të Barabarta dhe Ministria e Ekonomisë, Tregtisë dhe Energjetikës zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Sali Berisha